

**Regional News Unit AIR Aizawl**  
**Tuesday, June 02, 2026**  
**Time - 7:30 -7:40 Hrs**  
**AKASHVANI AIZAWL**

**REGIONAL NEWS BULLETIN**

**HEADLINES (MORNING)**

- **Larsap General (Rtd) Vijay Kumar Singh a'n Sawrkar laipuiin hmar chhak state hmasawna a dah pawimawh thu sawiin, Union Home Minister hova neih tur NEC Plenary-ah Mizoram hmalakna leh mamawhte tha taka thlen a nih theih nan line department hrang hrang hotute theihtawp chhuah turin a chah.**
- **Prime Minister Narendra Modi kaihhruai NDA sawrkar kaltlanga tanpuina dawngtu Hnahthial District-a New Ngharchhip khaw mi ten an chhawr tangkai thu an sawi.**
- **President Droupadi Murmu-I chuan Myanmar chu India tan Neighbourhood First, Act East leh MAHASAGAR policy ah a thawhpui pawimawh tak anih thu a sawi.**
- **India-Oman Comprehensive Economic Partnership Agreement(CEPA) chu nimin atang khan hman tan a ni**

<><><>

**NEC PLENARY SESSION**

**Larsap General (Rtd) Vijay Kumar Singh a'n Sawrkar laipuiin hmar chhak state hmasawna a dah pawimawh thu sawiin, Union Home Minister hova neih tur NEC Plenary-ah Mizoram hmalakna leh mamawhte tha taka thlen a nih theih nan line department hrang hrang hotute theihtawp chhuah turin a chah.**

**Nimin tlai khan Lok Bhavan Conference Room-ah Larsap hovin Naktip June ni 4, 2026-a North Eastern Council (NEC) Plenary vawi 73-na, Shillong, Meghalaya neih tur atana Mizoram inpuahchahnate thlir ho a ni a, He hunah hian NEC Plenary vawi 72-na, December, 2024-a Agartala, Tripura-a neiha Mizoram kaihnawih hmalakna tura tih bawhzui a nih dante bakah NEC Plenary, Shillong atana inpuahchahnate Pu David Lalthantluanga, Secretary, Planning & Programme Implementation Department-in Powerpoint Presentation hmangin a sawi fiah a. Heng bakah hian NEC leh Ministry of DoNER hnuaia projects kalpui mek - NEC funded Projects, NESIDS (Roads), NESIDS (OTRI) leh PM-DevINE Projects - chungchangte sawi ho a ni a. Heng bakah hian NEC Plenary-a Mizoram hamthat nana thlen tur pawimawh hrang hrangte sawi ho a ni bawk.**

<><><>

## HOME MINISTER

Home Minister, Pu K. Sapdanga'n nimin khan MSU hruaitute hmu in BSF hnalaka dan palzutna nasat tak awm ni-a an hriat avanga Aizawl Police Station-a FIR an thehluh chungchang an sawipui.

MSU hruaitute chuan, Mizorama cheng ni loten Mizoram mi leh sa anga insawi a, BSF-ah Document dik lo siam chawp hmanga hna an zawm chungchangah kumin March ni 6 khan Aizawl Police Station-ah FIR an theh lut a. Thla 3 dawn a liam hnuah Sorkar atanga hmalakna chin hriat a nih loh bakah heng document lem hmanga Mizoram quota-a lutte hian vawiin thlenga hna an la thawk chhonzawm zel leh man an la ni lo chu an hriat thiam loh thu an Home Minister chu an hrih a, tun aia chak zawka hmala tur leh mi dik lote man vat turin an ngen a ni.

Pu K. Sapdanga chuan, MSU hruaitute thuthlen chu pawimawh a tih thu hrihlin, thil dik lo a awm a nih chuan huaisen taka do tur leh BSF hnalaka dik lo awm pawh MSU-te nen tangruala theihtawp an chhuah tur thu a sawi a ni.

<><><>

## SSU

Students' Self -Support Union chuan Pi R. Lalrodingi tan Tourism Department-in a chhawr tangkai theih tur post dang siam sak turin sorkar an ngen.

Students' Self -Support Union General Headquarters hruaitute chu nimin khan Tourism Directorate-ah lengin, tunhnaia Tourism Director atanga bang ta Pi R. Lalrodingi chungchang Department hotute leh thawktu hrang hrang an sawipui a. Tourism Department-a thawktute chuan Pi R. Lalrodingi chu an uithu leh an Department in an la mamawh thu an lo hrih a ni.

SSU chuan, Project hrang hrangah hmalak mek a tam avangin Pi R. Lalrodingi chu Tourism Director ni tawh lo mah se, Department nen an thawh ho zel theih nan post dang siamsak turin Sorka an ngen a. Politics leh mimal hamthatna duh vanga Sorkar hmalakna leh thiltum tithuanawp lo turin Zoram mipuite an ngen a ni.

<><><>

## KHET BACHAO ABHIYAN

Lei da zel tur ven kawnga hmalakna sorkar laipui hmalakna 'Khet Bachao Abhiyan' chu nimin khan Larsap General (Retd) Vijay Kumar Singh-an tun thla chhunga hman turin Lok Bhavan, Aizawlah a hawng.

Khet Bachao Abhiyan hi Ministry of Agriculture and Farmers' Welfare kaltlanga hmalakna a ni a. Hemi hmang hian lei tak dan zirchianna neih hmasak zet hnuah inpawlh rual leh him zawk hmanga lei tha hman bakah leilung nena inrem taka lo neih chu ngaihpawimawh a ni.

Larsap chuan thar tam duh avanga nasa taka chemical fertilizer leh rannung thahna hlo hman thin ten ram leilung leh hriselna thlenga nghawng thalo a thlen thu sawiin, hemi laka him theih nan hian a taka ke pen chhuah a tul tawh a ni, a ti a. Prime Minister Pu Narendra Modi an National Mission on Natural Farming a lo tlangzarh tawh thu sawiin, lo neih dan leh thar chhuah a lo him zawk theih nan leilung mila lo neih chawilar deuh deuh a tul thu a sawi.

*Central Agriculture University (CAU), Imphal Vice-Chancellor, Dr. Anupam Mishra an 'Khet Bachao Abhiyan' chungchang a sawi dan chuan Buh leh thlai thar chhuah kawnga leilung leh mihring tana him lo hman thinte titem tura tanlak na tur a ni a, Khet Bachao Abhiyan chhungin sawrkar laipui scheme pawimawh leh hman tangkai dan zirtirna kalpui a nih dawn a ni. Loneitute hmasawn zel nan tanrual a pawimawh thu sawiin, soil health card, kisan credit card, farmers' ID leh crop Insurance-te ngaih pawimawh deuh deuh a tul thu a sawi bawk.*

*Vawiin hun hman hi Agriculture and Farmers' Welfare Minister Pu P.C. Vanlalruata chuan a telpui a. Line department hrang hrang official-te bakah loneitute an tel a ni.*

<><><>

## 12 YEARS OF NDA GOVT

Prime Minister Narendra Modi kaihhruai NDA sawrkar kaltlanga tanpuina dawngtu Hnahthial District-a New Ngharchhip khaw mi ten an chhawr tangkai thu an sawi.

Hnahthial-a Akashvani Correspondent Amy Lalmangaihzuali'n Hnahthial District-a New Ngharchhip khuaa cheng sawrkar laipui scheme chhawr tangkaitu hrang hrang a kawmna ah mipuiten an chhawr tangkai thu an sawi a, hamthatna hrang hrang an dawn chuan an khawsak a ti awlsam an ti a, Ayushman Bharat hnuai Golden Card nei ten an hman tangkai thu an sawi bawk.

Prime Minister Narendra Modi kaihhruai NDA sawrkar hian kumin hian a kum 12-na a tling a, hemi pual hian Akashvani News Aizawl chuan sawrkar laipui hmalakna hrang hrangah mithiamte a kawm a, hengte hi Akashvani News Aizawl youtube channel leh Social media hrang hrangah hmuh leh ngaihthlak theihin a awm a ni.

<><><>

## 100 DAYS CAMPAIGN

Ministry of Health & Family Welfare hmalaknaa TB umbo beihpui thlak mek "100 Days Campaign" chu ngawrh taka kalpui mek a ni a, TB vei 370 vel hmuhchhuah a ni tawh.

He campaign hi Mizorama district zawng zawngah kalpui vek niin TB hluar theihna hmun bika ngaih "High Risk Village/Ward" te chu ngaih pawimawh a ni a.

Heng hmunah te hian mipui zawng zawng screen vek tur a ni. Kan corr report lo ngaithla ang.

*TB umbo beihpui thlak mek "100 Days Campaign" hi kumin March ni 24 atang khan kalpui tan a ni a, hemi hnuaiah hian TB vei awlsam bika ngaih zunthlum nei, BP sang, meizu, zu in mi, kum 60 chunglam, Chuap TB damlo chenpui te phe chu endik ngei ngei tur an ni.*

*National Health Mission Mizoram hnuaia National TB Elimination Programme chuan bul an tan atanga thlahlui May 24 thleng khan campaign hi a kalpui a, hemi hun chhung hian Screening camp vawi 340 neih a ni a, X-ray hmanga endik zat hi mi 25509 an ni a, TB vei hmuhchhuah tawh zat chu mi 370 an ni a, Chuap TB damlo chenpui zinga TB venna (TPT) chu mi 488 hnenah pek a ni tawh bawk.*



## ASF

Vawk pul hri, African Swine Fever (ASF) avanga kum 2024 chhunga vawk suat neitute hnena zangnadawmna pek tur cheng nuai 2195 chu vawk neitute hnenah pek a ni tawh a; sorkar laipuih kum 2025-a vawk suat neitute hnena pek tur zangnadawmna cheng nuai 194 vel dil lek mek a ni.

AH&Vety department hotute chuan Akashvani News Aizawl zawhna chhangin, ASF vanga vawk suat neitute hnena zangnadawmna pek tur chu central sorkar leh Mizoram sorkarin an za zela 50 ve ve-in an intum sem avangin sorkar laipuia zangnadawmna tura chhut atanga zaa 50 dil thin a ni a, hemi atanga sorkar lipuiin a rawn pek ang zat chiah hi state sorkar chuan a pe ve thin. Kum 2024 chhunga vawk suat neitute hnena sorkar laipuia zangnadawmna dil hi a vaiin a rawn pek loh avangin zangnadawmna pek zawng zawng hi zaa 89 vel a ni, an ti.

ASF vang hian Mizorama vawk vulhtuten harsatna an tawh nasa hle a, kuminah pawh hmun thenkhatah a leng leh tawh. Kum 2024 khan ASF vanga vawk suat hi 26,600 chhinchhiah a ni a, chungte chu - Kg 15 hnuailam 3367, kg 15-40 inkar 4993, kg 40-70 inkar 6420, kg 70-100 inkar 6155 leh kg 100 chunglam 5665 an ni.



## AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.



## LIVESTOCK INSURANCE

Ran vulhtuten an ran vulhte an thih palh pawha sum an hmuh theihna tura Mizoram sorkarin National Insurance Company (NIC) thawhpua sorkar laipui scheme National Livestock Mission (NLM) hnuaia a kalpui 'Animal Insurance'-ah nimin thleng khan vawk 2774, bawng 6 leh kel 7 insurance tih a ni tawh.

NIC hotute hnen atanga Akashvani News Aizawl thudawn danin, ran insurance tihnaah hian nimin thleng khan vawk vulhtuten an vawk vulh lai 2774 chu insurance an tihsak tawh a, Aizawl district-ah vawk insurance tihsak 1550 awm tawhin a tam ber a; Siaha district-ah insurance ti an la awm lo. Bawng insurance tihsak hi Aizawl district-ah 5 leh Serchhip district-ah 1 a ni a; kel insurance tihsak tawh 7 hi Lunglei district-a mi vek an ni.



## MYANMAR KMMTTP

President Droupadi Murmu-I chuan Myanmar chu India tan Neighbourhood First, Act East leh MAHASAGAR policy ah a thawhpui pawimawh tak anih thu a sawi. Nimin tlaia Myanmar President U Min Aung Hlaing nen Rashtrapati Bhavan-a an inkawmnaah he thu hi sawiin Pi Murmu-I chuan India leh Myanmar chuan kum za chuang inzawmna thuk tak an lo nei tawh a ti a. India tana Asia Chhimchhak chhuahka pawimawh tak chu Myanmar anih thu sawiin ASEAN ram zingah ramri a tawmpui awmchhun a ni a ti bawk. President Murmu-I chuan Myanmar President Min Aung Hlaing chu President nihna a chelh chhonzawm avangin a lawmpui thu a sawi bawk a ni.

Nimin vek khan Prime Minister Narendra Modia leh Myanmar President U Min Aung Hlaing te inbiain Kaladan Multi Modal Transit Transport Project a hma thei ang bera thawh zawh an remti. New Delhi-ah PM Modia leh President Min Aung Hlaing te hian India leh Myanmar inkara thil pawimawh chi hrang hrang an sawidun a. Union Foreign Secretary Vikram Misri chuan ram pahnih hruaitute hian thawhdunna tha lehzual siam an remtih bakah sumdawanna leh sum peipunna, hmasawanna hnaa thawhdun, hriselna, zirna leh energy lamah tha zawka thawhdun an remti a ti a. Mipuite inkalpawhna tur tha an ngaih pawimawh thu sawiin Kaladan Multi-Modal Transit Transport Project chu a hma thei ang bera thawh zawh nise an ti a Sumdawanna leh eibarzanwna lama thawhdunnate, ralthuam leh venhimna khawih thilte, ramri chungchang bakah mipuite inpawhna tura nunphung inthlengtawn chungchangte an sawidun a ni.

Pu Modia chuan Myanmar-in ram zalen leh mahnia inrelbawlina tha nei tura thuneihna a neih chu a zah sak thu sawiin ram pahnihten an himna ti derthawng thei chetlakna hrang hrang atan an ramchhung ve ve hman an remtih loh thu an sawi bawk a ni.



## INDIA OMAN

**India-Oman Comprehensive Economic Partnership Agreement(CEPA) chu nimin atang khan hman tan a ni a. He inremna thar hnuaiah hian India atanga Oman-a sumdawna bungraw thawnlututen chhiah zaa 98 an awl thei dawn a ni. Union Minister of Commerce and Industry Piyush Goyal chuan CEPA chu sumdawna lama inremna mai niloin ram pahnih inrintawna a ni a ti a. India leh Oman thawhdunnaah hmasawna a thlen dawn a ni a ti bawk.**

